

## Mīžius pjaununt

Dirvuo uždainiāva dalgē kap gīduorē,  
Mīžē varpu galvas nulinki pri žēmis.  
Rēks puo dalgiu polti, nuori a nanuori.  
Rēks palēkti dirva, kur esi gīvenis.

Muotriškas kap vākus piedus jam i kliebi.  
Sorištus pagolda un plikū ražīnu.  
I nuven par dirva pradalgis kap viežis –  
Ruods, ka plāti kēli būtu kas praskīnis.

Kap visus sugolda, lenkas viel iš lieta.  
Mindelius i eili praded sustatīti.  
Paražen dā biški, ka tvirčiau stovietu  
I, pakilus viejū, naisivartītu.

Kap užbaigs dainiūti dalgē kap gīduorē,  
Daržinie unt jūstu atsipūst' padžiausma.  
Vuo parēs i mīžē – krūpinikis bruolē,  
Kīma paukščiu lesals i žvirbloku džiaugsmas.